

中国边疆研究资料文库·边疆民族资料初编

西北及西南民族

中国边疆研究资料文库·边疆民族资料初编

西北及西南民族

新平知

PDG

清·曹振鏞等撰

欽定平定回疆剿擒逆裔方略

卷三五——四三

清道光刻本

欽定平定回疆剿擒逆裔方略

二一六三



欽定平定回疆勦擒逆裔方略卷之三十五

道光六年冬十一月己亥

烏魯木齊籌辦鼓鑄

烏魯木齊都統英惠奏言前奉

諭旨命德英阿會同_臣等籌畫西南兩路鼓鑄事宜

_臣遵卽移知德英阿恒敬一體籌畫惟查烏魯木齊地方並未設局鼓鑄茲值軍用浩繁之際

自應設法籌辦俾錢法流通於兵民有裨

臣當

卽札飭鎮迪道傳飭各屬在附近山場詳細履
躡如有銅苗可以開礦卽行招商認採銅斤或
解送伊犁加卯鼓鑄或卽由烏魯木齊設鑪開
鑄容俟該道詳覆再行通盤籌畫奏入報

聞

英惠奏報那桑阿於十月二十四日自烏魯木

齊起程前赴軍營

辛丑

恩緩甘肅供應兵差州縣民欠糧賦

署陝甘總督鄂山奏言甘省自本年七月以來
回疆不靖東西大路各州縣供送官兵轉運軍
火餉項所需車馬雖俱係地方官給價雇覓而
小民往來支應奔馳趨事數月之中殆無休息

僻路各州縣雖兵差較少而調派受雇協濟情形亦大略相同甘省地處邊陲民貧土瘠兼之本年夏秋兩收統計未能十分豐稔若令將本年新舊錢糧一併輸納恐民力有所不逮請將節年民欠正雜各款緩徵奏入

上諭內閣曰甘省現值兵差絡繹各州縣供送官兵轉運軍餉小民或往來支應或受雇協濟殊堪軫

念自應量爲調劑著將狄道州等四十四廳州縣
及縣丞州同州判所管地方自嘉慶二十三年起
至道光五年止各年民欠未完額賦正耗及雜項
一切錢糧俱緩至來年秋後帶徵俾閭閻漸臻充
裕該署督卽刊刻謄黃曉示無許稍有欺隱

署陝甘總督鄂山疏奏接奉

硃諭咨會長齡會同盧坤嚴禁軍需局員奢華浮冒

上批諭曰總要一秉大公破除情面如有不肖者從嚴叅辦懲一警百毋負諄諄誥誡之意

壬寅

命原任按察使方載豫馳赴烏魯木齊幫辦糧餉

鄂山盧坤奏言臣等伏查軍行以糧餉爲重此

次回疆用兵旣以阿克蘇爲大營自應先將糧餉二項籌運充足以期供支無缺除軍前兵餉

已由省局肅州及安肅道庫先後撥解過銀一百二十萬兩約計大兵未到之前總可陸續運至阿克蘇其兵糧因烏魯木齊存貯充裕經英惠奏明由該處就近轉運較爲省便所需腳價等費已由省局陸續撥解銀一百萬兩又由肅州委員解往銀二十萬兩先後共解過銀一百二十萬兩該處駝隻不敷先經_臣等委員齎銀

分投雇買並請於附近陝西山西二省購駝八千隻解甘備用茲據甘省各府州縣委員報稱雇買兩項駝一萬二千五百四十隻又奉

旨賞收阿拉善王進駝一千隻並酌調烏里雅蘇臺官駝四千隻又准陝西代雇駝四千隻又准山西咨稱已買起解者一千隻尙未起解者四千餘隻共計已有二萬六千五百數十隻現將已

解肅州駝一萬一千六百五十七隻飭令趕解
出關前赴烏魯木齊聽候分撥托克遜各臺以
資輓運並將已報雇買尙未解至肅州各駝隻
嚴催趕解毋任稍延臣等查烏魯木齊至阿克
蘇三十二站計程二千八百餘里以軍營各路
官兵齊集約五萬餘人計算每日需糧五百餘
石每月需糧一萬五六千石按京斗二石用駝

一隻則每日運糧五百餘石應用駝二百五十
六隻每站有駝五百餘隻卽足供一往一還日
日輪番滾運不致間斷以三十二站覈計共應
需駝一萬六七千隻查烏魯木齊本有駝六七
千隻內地祇須寬爲協濟駝一萬二三千隻儘
敷該處轉運糧石之用今已有駝二萬六千五
百數十隻除撥解烏魯木齊一萬二三千隻外

尙餘駝一萬數千隻俟供用各兵差過竣後卽
可分撥關外之安西哈密吐魯番及喀喇沙爾
庫車各臺站專供內地解往大營兵餉軍火器
械滾運馱載之需足敷應用所有前派甘省未
雇未買及陝西省業已代雇四千隻其未買之
二千隻_臣等現已遵

旨分別咨行一概停止山西省未買齊之駝若已買

足卽一併催趲解甘儻尙未買齊卽毋庸再購
仍俟各處所買駝隻解齊覈計如有多餘卽將
所雇各駝隻按數追還以省雇價又楊遇春等
前奏購辦雙套鐵腳車四千輛甘省素少此車
現據各州縣購得九百餘輛已飭送至肅州供
載出口官兵之用現在初調續調各官兵均過
蘭州其餘未買之鐵腳車三千餘輛臣等亦遵

旨通飭停止以節糜費再喀喇沙爾庫車二處臣等
先已發交委員銀兩設法採辦糧石草料正慮
委員等呼應不靈仰蒙

聖明洞燭機先派令巴哈布那彥寶等督率經理現
已遵

旨飛咨巴哈布那彥寶等查明所管各地界如可採
買糧石卽飭令派去管理糧臺委員動項購辦